



ЎЗБЕКИСТОН — НАВРЎЗ ЗАМИНИ, БИЗ — НАВРЎЗ ХАЛҚИ



Юртимизда Наврўз тонги отди. Янгиланиш, тенглашиш, бирлашиш, ҳамжиҳатликнинг янги фасли бошланди. Саховатли куёшнинг заррин нурлари деҳқон даласига, чорвадор яйловига қут-барак муҳдасини қадайдди. Тонгни ризқ-насиба, дея улуғлайдиган донишманд халқимиз қўлини дуога очади: юртимиздаги тинчлик-хотиржамликка кўз тегмасин, бошлаган қутлуғ ишларимиз, эзгу амалларимиз давомли, элимиз омон бўлсин!

Шу тариқа диёримизга байрам — Наврўз шуқуҳи ёйлади. Асосий байрам тадбири пойтахтимиздаги "Humo Arena" мажмуасида бўлиб ўтди. Муҳташам саройга сенаторлар, депутатлар, ҳукумат аъзолари, давлат ва жамоат арбоблари, турли соҳаларда

меҳнат қилаётган юртдошларимиз, муҳтарам нурунийлар, ёшлар, мамлакатимизда фаолият кўрсатаётган хорижий давлатлар элчихонаси ва халқаро ташкилотлар вакиллари ташриф буюрди.

▶ Давоми 2-бетда

ЎЗБЕКИСТОН РЕСПУБЛИКАСИ ПРЕЗИДЕНТИ ШАВКАТ МИРЗИЁЕВНИНГ НАВРЎЗ УМУМХАЛҚ БАЙРАМИГА БАҒИШЛАНГАН ТАНТАНАЛИ МАРОСИМДАГИ ТАБРИК НУТҚИ

Ассалому алайкум, қадрли ватандошлар!

Хурматли меҳмонлар!

Аввало, сиз, азизларни, кўп миллатли бутун халқимизни шарқона янги йил — Наврўз байрами билан чин юракдан самимий табриклайман.

Барчангизга тинчлик-омонлик, сиҳат-саломатлик, бахту саодат ва улкан ютуқлар тилайман.

Бугунги файзли дамларда чет эллардаги ватандошларимизни ҳам Наврўз айёми билан қутлаб, уларга чўқур ҳурматим ва эзгу тилақларимни изҳор этаман.

Муҳтарам дўстлар!

Биз баҳор, яшариш ва янгиланиш фасли — Наврўзи оламни ҳаммаша орзиқиб, интизорлик билан кутамиз.

Аммо бу галги соғинчимиз чексиз, десам, уйлайманки, сизлар ҳам менинг фикримга қўшиласиз.

Чунки коронавирус пандемияси туфайли биз кейинги икки йилда ушбу ардоқли байрамни халқимиз кутганидек юксак даражада нишонлай олмадик.

Мана, ниҳоят, Наврўз байрамини яна кексаю ёш барчамиз биргаликда катта шоду хуррамлик билан қарши олмақдамиз.

Бугун Наврўз байрамини Сиз, азизлар билан мана шу муҳташам "Хумо" саройида ўтказаяпмиз.

Чунки барчангиз кўриб турибсиз — сўнги ҳафтада юртимизда ҳаво совиб, ёгингарчилик юз бермоқда.

Аммо ҳаммамиз яхши тушунамизки, шу кунларда осмондан ёмғир эмас, оби раҳмат ёғмоқда, қут-барак билан ризқу рўз ёғмоқда. Бунинг учун Яратганга ҳар қанча шукроналар айтсак арзийди.

Буюк аллома Ҳажим Термизий бобомиз ўзининг "Наврўзнама" китобида "Наврўзи олам душанба кунини кирса, ёмғир, қор ёғади, деҳқончилик, ҳосил мўл бўлади — йил тўқчиликда ўтади", деб ёзганлар.

Бу фикрлар бугун — айна душанба кунини Наврўзи кутиб олаётган эл-юртимизнинг эзгу орзу-ниятлари билан уйғун ва ҳамоханг десак, ҳар томонлама тўғри бўлади.

Хурматли байрам иштирокчилари!

Биз мамлакатимизда бошлаган улкан ислохотларимизни давом эттириш мақсадида Янги Ўзбекистон тараққиёт стратегияси ҳамда "Инсон қадрини улуғлаш ва фаол маҳалла йили" дастурини қабул қилдик.

Меҳнаткаш ва олижаноб халқимиз миллий ривожланишнинг янги даврига улғувор мақсад ва амалий ишлар билан кириб бормоқда.

Бунинг тасдиғини биз бугун ҳар бир оила, ҳар бир маҳалла, қишлоқ ва овуллар, шаҳарларимиз мисолида яққол кўришимиз мумкин.

Юртимизда юзлаб замонавий корхоналар, йўл ва коммуникация тармоқлари, шинам турар жойлар, янги боғча ва мактаблар, олийгоҳлар ҳамда маданият масканлари, тиббиёт ва

спорт иншоотлари барпо этилмоқда. Барча худудларимизда "Янги Ўзбекистон" боғлари, "Янги Ўзбекистон" массивлари бунёд қилинмоқда.

"Обод маҳалла" ва "Обод қишлоқ" дастурлари қаторида бутун мамлакатимиз бўйлаб "Яшил макон" умуммиллий лойиҳаси амалга оширилмоқда.

Ушбу бетақдор айёмда Наврўзнинг олижаноб қадриятларидан куч-қувват ва илҳом олган халқимиз маҳаллаларда хашарлар қилиб, кўчат ва гуллар экиб, янги-янги боғ-роғлар, сайилгоҳлар яратмоқда.

Айтиш мумкинки, айна пайтда бутун мамлакатимиз байрам кайфияти ва бунёдкорлик руҳи билан яшамоқда.

Қадрли дўстлар!

Маълумки, дунёда турли байрамлар, қутлуғ саналар кўп. Лекин инсон қадрини ва шаънини улуғлашда Наврўз айёми алоҳида ўрин тутлади, десак, айна ҳақиқатни айтган бўламиз.

Наврўзи олам бизни табиат фарзанди бўлиб, Ватан тупроғини, она заминдаги ҳар бир гиёҳни кўзимизга тўтиё қилиб яшашга ургатади.

Наврўз ҳаммамизга инсонийлик, меҳр-оқибат ва бағрикенглик фанидан сабоқ беради.

Шу файзли лаҳзаларда барчамиз тинчлик ва осойишталик нақадар бебаҳо неъмат эканини, унинг кадр-қиммати ва аҳамиятини яхши англаймиз.

Бугунги мураккаб дунёда халқимиз ҳаётини, фарзандларимиз келажагини,

мусаффо осмонимизни асраб-авайлаш учун ҳар биримиз масъул ва жавобгар эканимизни янада чуқурроқ ҳис этамиз.

Наврўз байрами мамлакатимизда яшаётган, миллати, тили ва динидан қатъи назар, барча ватандошларимиз учун умумхалқ байрамига, энг сеvimли ва ардоқли айёмга айлангани билан ҳурмат, саховат ва мурувват туйғуларини яққол намойён бўлмоқда.

Инсон қадрини улуғлашга қаратилган эзгу ишларимиз доирасида кенг жамоатчилик уйма-уй юриб, беморлар, кекса ва ногиронларга, кўмакка муҳтож оилаларга меҳр-оқибат, амалий ёрдам кўрсатмоқда.

Биз барча ҳавас қиладиган бундай боқий урф-одатларимизни кўз қорачиғидек асраб, азиз фарзандларимизни мана шундай юксак одамийлик руҳида тарбиялашни давом эттиришимиз лозим.

Ушбу имкониятдан фойдаланиб, Халқаро Наврўз кўни муносабати билан барча хорижий дўстларимиз ва ҳамкорларимизни, бугунги байрамимизда иштирок этаётган дипломатик корпус вакилларини улуғ айём билан табриклаб, уларнинг мамлакатлари ва халқларига тинчлик, фаровонлик ва раванг тилаймиз.

▶ Давоми 2-бетда

РОССИЯ ПРЕЗИДЕНТИ ЎЗБЕКИСТОН ХАЛҚИНИ НАВРЎЗ БАЙРАМИ БИЛАН ТАБРИКЛАДИ

21 март куни Ўзбекистон Республикаси Президенти Шавкат Мирзиёевнинг Россия Федерацияси Президенти Владимир Путин билан телефон орқали мулоқоти бўлиб ўтди.

Сўхбат аввалида Россия Президенти давлатимиз раҳбари ва Ўзбекистоннинг кўп миллатли халқини баҳор, янгиланиш байрами — Наврўз билан самимий табриклаб, фаровонлик ва раванг тилади.

Етакчилар мамлакатларимиз ўртасида дипломатик муносабатлар ўрнатилганининг 30 йиллиги билан ҳам бир-бирини чин юракдан қутладилар.

Кейинги йилларда Ўзбекистон — Россия ҳамкорлиги мисли кўрилмаган юксак — стратегик шериклик ва иттифоқчилик даражасига чиққани мамнуният билан таъкидланди.

Амалий ҳамкорликнинг самарали механизми фаолият юритмоқда, унинг энг муҳим йўналишлари бўйича яқин мулоқот йўлга қўйилган. Товар айирбошлаш барқарор ошиб бормоқда. Утган йил якунида ўзаро савдо қўрқаткичи 7,5 миллиард долларга етди, жорий йил бошидан эса 50 фоизга ортди.

Устувор инвестиция лойиҳалари амалга оширилмоқда. Россиянинг мамлакатимиз иқтисодига инвестициялари ҳажми қарийб 10 миллиард долларни ташкил этмоқда. Икки мингдан зиёд қўшма корхона фаолият юритмоқда.

Россиянинг нуфузли делегацияси шу ҳафта пойтахтимизда бўлиб ўтаётган Тошкент Халқаро инвестиция форуми ишида иштирок этиши кутилмоқда.

Фаол маданий-гуманитар алмашинув давом этмоқда.

Мулоқотда савдо, инвестициялар, саноат кооперацияси каби муҳим соҳаларда, шу жумладан, Ўзбекистон ва Россия худудларининг етакчи корхоналарини жалб қилган ҳолда, кўп қиррали икки томонлама ҳамкорлигини янада ривожлантириш ва мустаҳкамлаш истиқболлари муҳокама қилинди.

Икки мамлакат вазирлик ва идораларининг олий даражада эришилган келишувларни кенг қўлама амалга ошириш бўйича фаол алоқалари ва ўзаро мувофиқлашган ишлари давом эттириш муҳим экани қайд этилди.

Минтақа ва халқаро кун тартибидеги масалалар, жумладан, Украина атрофида юзага келаётган вазият юзасидан фикр алмашилди.

Ўзбекистон ва Россия Президентларининг телефон орқали мулоқоти ҳар доимгидек дўстона ва ишонч руҳида ўтди.

ЎЗА

САМИМИЙ ҚУТЛОВЛАР

Баҳор, табиат уйғониши ва янгиланиш рамзи бўлган Наврўз байрами муносабати билан Ўзбекистон Республикаси Президенти Шавкат Мирзиёев номига хорижий давлатлар ва ҳукуматлар, етакчи халқаро ташкилотлар раҳбарлари, таниқли давлат ва жамоат арбобларидан самимий қутловлар келмоқда. Уларда Ўзбекистоннинг кўп миллатли халқига тинчлик-осойишталик, фаровонлик ва раванг тилақлари изҳор этилган.

Хорижий ҳамкорлар ўз қутловларида Янги Ўзбекистондаги мамлакатни барқарор ижтимоий-иқтисодий ривожлантириш, аҳоли фаровонлигини оширишга қаратилган ислохот ва янгиланишларда эришилаётган катта ютуқ ва муваффақиятларни, давлатимизнинг халқаро майдондаги нуфузи изчил мустаҳкамланиб бораётганини алоҳида қайд этган.

▶ Давоми 2-бетда

ИНСОНПАРВАРЛИКНИНГ ЮКСАК НАМУНАСИ

Ўзбекистон Республикаси Президенти Шавкат Мирзиёев Наврўз умумхалқ байрами арафасида халқимизга хос эзгулик, бағрикенглик, инсонпарварлик, меҳр-оқибат ва кечиримли бўлиш каби олижаноб фазилатларнинг ёрқин ифодаси сифатида "Озодликдан маҳрум этиш жазосини ўтаётган, қилмишига чин кўнгилдан пушаймон бўлган ва тузалиш йўлига қатъий ўтган бир гуруҳ шахсларни афв этиш тўғрисида"ги фармонни имзолади.

Фармонга мувофиқ, Ўзбекистон Республикаси Конституциясининг 93-моддаси 23-бандига асосан жазо муддатини ўтаётган ҳамда қилмишига чин кўнгилдан пушаймон бўлган ва тузалиш йўлига қатъий ўтган 75 нафар шахс афв этилди. Афв этилган шахсларнинг 4 нафари асосий жазодан тўлиқ озод этилди, 53 нафари жазони

ўташдан муддатидан илгари шартли озод қилинди, 2 нафарининг озодликдан маҳрум этиш жазоси енгилроқ жазо билан алмаштирилди. Шунингдек, 16 нафар шахсларга тайинланган озодликдан маҳрум этиш жазосининг муддатлари қисқартирилди.

Афв этилганларнинг 18 нафарини чет эл фуқаролари, 17 нафарини аёл, 15 нафарини 60 ёшдан ошган шахслар, 6 нафарини ногиронлар ҳамда 9 нафарини тақиқланган ташкилотлар

фаолиятида қатнашган шахслар ташкил этади.

Фармон ижроси юзасидан афв этилган шахсларни оиласи ва яқинлари бағрига қайтариш, ижтимоий ҳаётга мослашиб, фойдали меҳнат билан шуғулланишлари, соғлом турмуш тарзини йўлга қўйиб, жамиятда муносиб ўрин топишлари учун уларга кўмак бериш бўйича масъул вазирлик ва идораларга тегишли топшириқлар берилди.

ЎЗА

